



BOSNIA AND HERZEGOVINA
Ministry of Foreign Trade and Economic Relations
Veterinary Office of Bosnia and Herzegovina

Na osnovu člana 21. tačke 2. i člana 84. tačke 1. Zakona o veterinarstvu u Bosni i Hercegovini ("Službeni glasnik BiH", broj 34/02), Ured za veterinarstvo Bosne i Hercegovine donosi

UPUTSTVO

o zabrani uvoza određenih pošiljki radi sprečavanja unosa u Bosnu i Hercegovinu slinavke i šapa

Član 1.

(1) Radi sprečavanja unosa u Bosnu i Hercegovinu slinavke i šapa zabranjuje se uvoz u Bosnu i Hercegovinu i provoz preko područja Bosne i Hercegovine slijedećih vrsta pošiljki:

- a) domaćih i divljih papkara,
- b) sjemena i embrija/jajnih ćelija porijeklom od papkara,
- c) namirnica, proizvoda, sirovina i otpadaka, porijeklom od domaćih i divljih papkara,
- d) hrane za životinje porijeklom od papkara.

a koji su porijeklom iz

- **Savezne države Brandenburg i Grada Berlina u Njemačkoj,**
- **Mađarske,**
- **Slovačke,**
- **Saveznih država Donja Austrija i Burgenland u Austriji.**

(2) Pored navedenog, zabranjuje se uvoz pošiljki iz tačke a) stava (1) ovog člana, koje potiču iz drugih država ako se prije ulaska na teritoriju Bosne i Hercegovine prevoze preko područja navedenih u stavu (1) ovog člana.

Član 2.

Bez obzira na odredbe navedne u članu 1. ovog Uputstva, zabrana se ne odnosi na slijedeće pošiljke:

a) Proizvodi od mesa koji moraju biti podvrgnuti najmanje jednom od slijedećih postupaka obrade:

- 1) toplinskoj obradi u hermetički zatvorenim posudama, uz Fo vrijednost od 3,00 ili više;
- 2) toplinskoj obradi na minimalnoj temperaturi od 70° C, s tim da je ta temperatura dostignuta u svim dijelovima;
- 3) toplinskoj obradi na minimalnoj temperaturi od 80° C, s tim da je ta temperatura dostignuta u svim dijelovima;
- 4) toplinskoj obradi u hermetički zatvorenim posudama na temperaturi od najmanje 60°C kroz najmanje četiri sata, tokom kojih temperatura u središtu mora iznositi najmanje 70°C kroz 30 minuta;
- 5) prirodnoj fermentaciji i zrenje otkoštenog mesa mora trajati najmanje 9 mjeseci, te rezultirati slijedećim karakteristikama: sposobnost vezanja vode (Aw vrijednost) nije veća od 0,93 ili pH vrijednost nije veća od 6,0;

b) Sirove kože ukoliko su bile obrađene na jedan od sljedećih načina:

- 1) tretirane kalcijevom lužinom na pH vrijednosti 12 do 13 najmanje 8 do 10 sati, te nakon toga tretirane kiselinom na pH vrijednosti 1 do 3 najmanje 6 do 10 sati;

- 2) soljene morskom soli uz dodatak 2% kalcinirane sode najmanje 7 dana, ako su tako obrađene kože bile skladištene najmanje 30 dana prije utovarivanja u mjestu porijekla;
 - 3) sušene 42 dana na temperaturi od 20°C, gdje način obrade mora biti naznačen na veterinarsko-zdravstvenoj svjedodžbi;
- c) Toplinski obrađena tehnička mast i želatin gdje je za vrijeme obrade postignuta temperatura u središtu proizvoda od najmanje 70°C;
- d) Vuna prana u alkalnom vodenom rastvoru pri pH vrijednosti 10, uz dodatak natrijeva karbonata (Na₂CO₃) u količini od 1,5 do 2 g na litru, i sušena u zračnoj struji pri temperaturi 80°C;
- e) Hemijski potpuno obrađeni proizvodi, kao što je wetblue koža, hromirana koža, kuhane čekinje i slično;
- f) Mlijeko i proizvodi od mlijeka namijenjeni ishrani ljudi obrađeni najmanje jednim od slijedećih postupaka:
- 1) sterilizacijom na Fo3 ili više;
 - 2) postupkom UHT;
 - 3) postupkom HTST, primijenjenim dva puta na mlijeku s pH vrijednošću 7,0 ili više;
 - 4) postupkom HTST za mlijeko s pH vrijednošću ispod 7,0;
 - 5) postupkom HTST u kombinaciji s drugim fizikalnim postupkom koji obuhvata:
 - snižavanje pH vrijednosti ispod 6,0 tokom najmanje jednog sata, ili
 - dodatno zagrijavanje do 72°C ili više, u kombinaciji s isušivanjem.
- g) Crijeva koja se uvoze u mliječnoj kiselini ili salamuri pH vrijednosti od 6,0 i niže;
- h) Trofeji divljih životinja, kuhani u kipućoj vodi dovoljno vremena da su otklonjena sva tkiva osim kosti, rogova, papaka, kandži ili zuba;
- i) Ekstrudirana suha hrana za kućne ljubimce.

Član 3.


Stupanjem na snagu ovog Uputstva prestaje važiti Uputstvo o zabrani uvoza određenih pošiljki radi sprečavanja unosa u Bosnu i Hercegovinu slinavke i šapa (broj: 02-4-02-2-47-7/25 od 28.03.2025. godine).

Član 4.

Ovo Uputstvo stupa na snagu danom donošenja i vrijedi do donošenja odgovarajuće Odluke Vijeća ministara Bosne i Hercegovine, odnosno do njegovog stavljanja van snage posebnom Odlukom radi prestanka opasnosti od unosa u Bosnu i Hercegovinu slinavke i šapa.

Broj: 02-1-02-2-47-8/25

Datum: 28.03.2025



DIREKTOR

Saša Bošković dr vet.med.

Dostaviti:

- Ministarstvo vanjske trgovine i ekonomskih odnosa – kabinet Ministra
- Svim graničnim veterinarskim inspektorima;
- Odjeljenje za zdravlje i dobrobit životinja;
- Odjeljenje za sigurnost hrane i uslove u objektima;
- Arhiva.